

金  
詩  
紀  
事

二

PL  
2533  
.C4j  
v.2





YORK UNIVERSITY

JUN 5 - 2001

ASIAN STUDIES

金詩紀事

卷之六

禮部

陽大定三年

獻

史院

不學知

史無一

新怡壯圖

Digitized by the Internet Archive  
in 2010 with funding from  
York University Libraries

中州東方五歲晚臥庭下見微雲往來天際忽聞乳母曰此

侯官陳衍

上東丹王七世孫人翰林爲修撰特

進士第官至翰林知政事進士議文

試從

貴同青眉關臺小

定燈花落生舞座

鋪定燈花落生舞座

鋪定燈花落生舞座






2583  
C4  
v.2  
YORK UNIVERSITY

JUN 5 - 2001

EAST ASIAN STUDIES

金詩紀事卷六

耶律履



侯官陳衍緝

履字履道自號忘言居士東丹王七世孫入翰林爲修撰特  
賜大定三年孟宗獻榜進士第官至參知政事進右丞諡文

獻

史院從事日感懷

不學知章乞鑑湖不隨老阮醉黃壚試從麟閣諸賢問肯屑蘭臺小  
史無一戰得侯輸妄尉長身奉粟媿侏儒禁城鐘定燈花落坐撫塵  
編惜壯圖

中州集方五歲晚臥廡下見微雲往來天際忽謂乳母曰此

所謂臥看青天行白雲者耶德元（嗣父）聞之曰此子當以文章名世其史院從事日感懷云云乃少作也

孟宗獻

宗獻字友之開封人大定三年進士供奉翰林未久卒

句

固知劫火終無盡誰謂清水也自焚

高公振特夫挽詩云誰謂詩成讖清水果自焚注云友之雪燭詩云云未幾下世

許安仁

安仁字子靖河間樂壽人大定七年進士官至汾陽軍節度使



望少室

名山都不見眞形萬仞盤盤入杳冥安得雲間騎白鶴下看三十六峯青

少室道中

少室峯頭曉月沈千家城郭淡陰陰五更雞唱殘星滅馬上看山過少林

少林寺

巖壑深嚴入翠微少林金碧露烟霏五峯屏簇禪庵小萬劫天開佛日輝聞說九年深面壁得逢二祖便傳衣千秋少室山靈在曾見神僧隻履歸

嵩嶽志少林寺西北里許五乳峯下有達摩菴又深入里許

爲達摩面壁庵面壁石在庵前上有達摩洞又寺西南爲二祖菴寺南爲少室山金許安仁有詩云云

句

婁相任唾面周廟貴緘口寸陰大禹惜三命考父走

遺山集許汾陽詩跋眼醫許太丞彥清示其從祖汾陽君山水圖詩語意高妙而其字畫與明昌辭人龍巖黃山諸公各自名家世尤寶惜之其子右司諫道真亦以能書稱今以汾陽筆法較之父子如出一手生平亦嘗見蔡大學安世大丞相伯堅濰州使君伯正甫三世傳字學雖明眼人亦不能辨前輩守家法蓋如此汾陽守澤州日戒子云云吾河東人至今傳誦之司諫在貞祐興定閒直言極諫與陳公正叔齊名



時號陳許父子名流在中朝百餘年少有似者而彥清承其  
後何其幸耶彥清隱於技者三十年技既高又所至以善良  
稱謂之稱其家蓋無愧也此詩渠家青氈其寶祕之當令後  
人知世德之所自云丙辰夏六月二十一日晚進河東元某  
謹書

郭用中

用中字仲正平陽人大定七年進士官陝州錄事有寂照居

能文士集

句

身臥不知雲子白氣酣聊作木奴酸  
灞橋柳絮人千里楚澤蘆花  
水半扉

中州集其賦醋魚云云按博物志西羌仲秋日取鯉子不去  
鱗破腹以赤粳米飯鹽醋合糝之逾月則熟謂之秋鮓故仲  
正云然又賦雪云云殊有詩人思致恨不假以年耳

趙文昌

文昌字當時陵川人官京兆轉運副使

句

蟲聲連壞壁樹色入秋窗 草香花落處山黑雨來時

中州集有詩云云頗爲黃華所稱

党懷英

懷英字世傑號竹溪宋太尉進士之十一代孫隨宦爲奉符  
人大定十年擢進士甲科官至翰林學士承旨諡文獻



中州集公之在孕也太夫人夢道士吳筠來託宿公生儀觀秀整如神仙少師毫社劉巖老濟南辛幼安其同舍生也

滏水集公之文似歐公不爲尖新奇險之語詩似陶謝奄有魏晉篆籀入神李陽冰後一人而已

又本朝百有餘年間以文章先稱者皇統閒宇文公大定閒無可蔡公明昌閒則党公於時趙黃山王黃華俱以詩翰名世至論得古人之正派猶以公爲稱首

金史懷英與郝俛充遼史刊修官應奉翰林文字移刺益趙颯等七人爲編修官

堯山堂外紀與濟南辛幼安同師蔡伯堅筮仕決以蓍辛得離決意南歸党得坎遂留仕金

香祖筆記金趙秉文嘗述党懷英論詩云律詩最難工五十  
六字皆如聖賢中有一字不經爐錘便如一屠沽兒廁其間  
也案此五代人劉昭禹語党述之耳

岫山驛亭阻雨

脫葉蕭蕭山木稠連檣飄汎海蓬秋浪回岫島馮夷舞雲暗蒼梧帝  
子愁欲往未行淹僕馬乍來還去羨鶻鷺景疏樓下無邊水暫濯塵  
纓可自由

自註東海地名蒼梧舊說云此島自蒼梧浮來又州有景疏  
樓

弔石曼卿

城頭山色翠玲瓏尙憶清狂四飲翁鐵馬冰車斷遺響桃花石室自



春風平生詩價千鈞重身後仙遊一夢空想見蓬萊水清淺芙蓉城  
闕五雲中

自註曼卿嘗通守岫山遣人以泥封桃李核彈之巖石閒其  
後花開滿山又嘗攜妓飲山之石室閒鳴琴爲冰車鐵馬聲

次文孺韻

病眼花生紙鞵懷棘遶牆挑燈簷溜急到枕漏聲長響徹鷄埒曙寒  
迎鴈背霜淒涼三徑菊無夢到壺觴

中州集按此詩是貢院中唱和故有花生紙棘遶牆之句

夢中作

矯冗連天花春風動光華人眠不知眠我佩絳紅霞

中州集党懷英詩壬辰二月六日夜夢作一絕句其詞云云

夢中自以爲奇絕覺而思之不能自曉故作是詩以紀之夢  
中作詩真何詩夢中自謂清且奇覺來反覆深詠味字偏句  
異誠難知豈非夢語本真語無乃造物爲予嬉君不見莊周  
古達士栩栩尙作蝴蝶飛我生開眼尙如此況在合眼夫何  
疑

楊廷秀

廷秀字茂才華州人大定中進士官至平涼府同知致仕貞  
祐初被法有楊晦叟集

案張鵬一楊晦叟遺集敘中州集云庭秀字德懋華州志因  
之然考金史楊邦基傳云字德懋華陰人華陰華州相鄰兩  
人同姓生同時疑中州集鈔錄之誤當以澤州石刻庭秀字



茂才號晦叟爲是

金史宣宗紀貞祐三年前京兆治中李友

友字誤當作公

直私逃華

州結同知防禦使馮朝河州防禦判官郝遵甫平涼州同知致仕楊庭秀水落縣主簿宿徽等團集州民號忠義扈駕都統府相挺爲亂殺其防禦判官完顏八斤及城中女真人以書約都統楊珪爲府兵所得珪諱之請自效誘友直等執之麾所招千餘人納仗阬諸城下時京師道路隔絕安撫司以便宜族友直等至是以狀聞乃贈八斤及被害官軍十餘人一官賻錢三百貫夏四月癸巳河東宣撫使胥鼎陳利害十三事長勝軍都統楊珪伏誅

楊晦叟遺集敍錄宣宗紀敍李公直事前後牴牾蓋始以安

撫之蒙蔽並遭誣陷繼以宣撫之申奏方正罪名此乃實錄未刪之稟漫鈔入紀者此事見於韓玉傳紀以諸人無傳故載筆不詳前奏失於改正

明華州志公政平訟理學富識精著書傳世

鳳臺縣志泰和初獻州刺史移判澤州注程楊易傳自號虎峯居士

題崆峒巖壁

屏風山下雪雲橫雪覆琵琶水一泓  
冰岫玲瓏巖溜滴琤琤珠落玉盤聲

漫漫積雪覆冰灘鳴咽泉流冰下難  
渾似樂天湓浦宿夜聽商婦月中彈



冰凍寒巖水落遲哀絃繼續轉淒悲水仙彈徹霓裳曲泓口驪龍睡  
不知

楊晦叟遺集泰和五年十一月連日雨雪平地深三尺上澣  
日游琵琶泓經聖宇巖欲訪唐人題字無路不得往緣澗踏  
雪至清風壁南望屏山下瞰琵琶泓泓周廣二百步許冰雪  
覆其上深不可測泓上絕壁懸冰玲瓏而水聲滴瀝若琵琶  
然彷徨賦詩書崆峒巖壁華山晦叟楊庭秀

泰和丙寅□後一日與客登松嶺謁李衛公祠留題法輪院

澤居太行顛繞郭山如帶西南古松嶺傑出羣峯外巉巖聳熊耳隱  
隱負鼇背小樓不垂簾倚欄日相對春分

鳳臺縣志作風

遇休沐浴累謝機

械寸心渴登臨老氣鼓衰憊陰厓冰磴滑浚澗鳥道隘瘦藤凌絕頂

清境豁眼界衛公廟貌尊英氣凜如在法輪靈跡古殿閣啓綵繪祖  
燈尙能續刼火不可壞盤亭接天壇胸次何蒂芥黃流會清沁脉絡  
分支派翠巒臥雲烟幽壑產珍怪松風韻笙磬巖溜響環珮此來真  
勝適所游了無礙不作白頭吟且償行脚債歎諦千金兒漫寫垂堂  
戒

鳳臺縣志云石刻在松嶺寺縣志載此詩與山石刻叢編多  
不同今注於下計照識

青蓮寺

青蓮勝概名天下竹杖芒鞋得得來障日亂峯圍翠柏倚天峭壁老  
蒼苔一爐沉水藏經閣千古清風擲筆臺欲訪開山聖賢跡繼碑細  
與拂塵埃



石刻云泰和丙寅上澣日華山晦叟楊庭秀茂才同來者倅  
車完顏永協和卿晉城丞馬國基仲賢司獄夾谷裕仲寬東  
林母彥倫俊卿男謙華侍行

成臯道中

瘦馬成臯道阻長崢嶸冰雪老年光九關欲上虎豹怒三徑未歸松  
菊荒嵩少雲煙聊駐馬漢唐宮殿兩亡羊鄭南嶺下梅花發千里相  
思空斷腸

楊晦叟遺集敘錄金自大安貞祐以來四境交兵圍燕竄汴  
中原不知誰屬忠義之士誠有不容坐視者故讀其成臯道  
中詩與韓溫甫檄語（韓玉傳及中州集）同挾悲憤之氣  
惜竟遭誣陷與李公直等駢首族滅

句

渴心曉夢江湖闊醉眼春風草木低

中州集學詩於蘭泉張吉甫有云云之句

孫鐸

鐸字振之大定十三年進士官至尙書右丞卒贈太子太師

句

披拂秋風如有待裴回涼月更多情

中州集作詩甚多其賦玉簪有云云之句甚爲詩家所稱

劉迎

迎字無黨自號無諍居士東萊人大定十四年登進士第除

幽王府記室改太子司經



修城行

淮安城郭眞虛設父老年前向予說築時但用雞糞土風雨卽摧乾  
更裂祇今高低如堵墻舉頭四野青茫茫不知地勢實衝要東連鄂  
渚西襄陽誰能一勞謀永逸四壁依前護磚石免令三歲二歲間費  
盡千人萬人力

金文雅自注唐州後竟用此策也

周馳

馳字仲才號迂齋濟南人大定中住太學屢以策論魁天下

貞祐之亂赴井死

戮子

私盍反  
支起也

勿以微才棄安危任不輕誰憐一片小能使四方平几案由吾正盤

孟免爾傾何當遇夷坦沈默更何營

中州集此詩王仲澤所傳或以爲仲澤作也以其與周仲才詩意相近姑附於此以俟更攷

王庭筠

庭筠字子端熊岳人大定十六年甲科官至供奉翰林稍遷修撰卒

遺山集王黃華墓碑七歲學詩十一歲賦全題讀書五行俱下卜居隆慮以謂西山橫截千里而黃華蔚然涵濃秀之氣自公來居以黃華山主自號茲山因之傑出暮年詩律深嚴七言長篇尤以險韻爲工世之書法皆師二王元章得其氣而魯直得其韻公則得於氣韻之間至於筆墨游戲則山水



有逸品之妙墨竹殆天機所到閑閑有上公詩云李白一杯  
人影月鄭虔三絕畫書詩馮內翰挽章云詩名摩詰畫絕世  
人品右軍書入神人以爲實錄云

遺山集扈從秋山應制賦詩至三十餘首

中州集其沒也道陵有詩悼之

鄴南城雨注瓦溝

鄴城之南青雀來五樓突兀肩三臺胡桃萬瓦淨如水春陰不敢生  
莓苔簷雨闌干三百尺多年雨嚙空階石繁華已逐水東流斷壁時  
從耕者得可憐此君落君手愛之不博連城璧錫花如雪錯菱花小  
字興和猶可識晴窓拂拭支桐君上下一般蛇蚺紋哀蟬遽止不成  
弄千古雨聲愁殺人

彰德志鄴中記曰北齊起鄴南城屋瓦皆以胡桃油油之光  
明不蘚筒瓦用在覆故油其背版瓦用在仰故油其面筒長  
二尺闊一尺版瓦之長如之而其闊倍今得其真者當油處  
必有細紋俗曰琴紋有白花曰錫花傳言當時以黃丹鉛錫  
和泥積歲久而錫花乃見古磚大者方四尺上有盤花鳥獸  
紋千秋萬歲字其紀年非天保則興和蓋東魏北齊也又有  
磚筒者花紋年號如磚內圓外方用承簷溜亦可爲硯鄴人  
有言曰銅雀瓦硯體質細潤而堅如石不費筆而發墨此古  
所重者而今絕無蓋魏去今千有餘年若此物者毀碎無存  
矣齊磚至今未及千年村夫剖土求之聚衆踰年不得鄴民  
乃僞造以紿遠方王荊公詩曰吹盡西陵歌舞塵當時屋瓦

始稱珍甄陶往往成今手尙托虛名動世人宋刺史李琮嘗  
言元豐初於丹陽邵不疑家得唐丙申歲元次山家藏鄴城  
古磚硯背有花紋及萬歲字與鄴中記合又曰大魏興和二  
年造則唐賢所珍已出於南城矣金袁輔之袁一作郭得鄴南城  
注雨瓦筒以之支琴王庭筠爲之賦詩云云

### 黃華亭五首

帝遣名山護此邦千山瑟瑟嵌西窓山僧乞與山前地招客先開四  
十雙

陶宗儀輟畊錄嘗讀金黃華老人詩有招客先開四十雙之  
句殊不可曉近讀雲南雜誌曰夷有田皆種稻其佃作三人  
使二牛前牽中壓而後驅之犂一日爲一雙以二乏爲已二



已爲角四角爲雙約有中原四畝地則老人之詩意見矣

手拄一條青竹杖眞成日挂百錢游夕陽欲下山更好空林無人不可留

王母祠東古佛堂人傳棟宇自隋唐年深寺廢無人住滿谷西風栗葉黃

游志續編劉祁遊林慮西山記又一里餘叢竹如雲竹中堂殿茅亭數處乃黃華古禪刹也今爲老氏居殿石柱刻宋人題名及張相天覺賦高歡避暑宮詩云南北紛紛似奕棋高王事業起偏裨情知騎虎非安計豈是青山避暑時因憶王翰林子端遊黃華詩蓋此寺廢已久王詩云云

挂鏡臺西挂玉龍半山飛雪舞天風寒雲直上三千尺人道高歡避

暑宮

謝榛詩說金王庭筠黃華山絕句挂鏡云云邊華泉謂詩及  
行草皆入化矣

獄中賦萱

沙麓百戰場烏鹵不敏樹況復幽圉中萬古結愁霧寸根不擇地於  
此生意具婆婆綠雲杪金鳳掣未去晚雨沾濡之向我泣如訴忘憂  
定漫說相對清淚雨

中州集柳州戲題堦前芍藥東坡長春如稚女及賦王伯鸚  
所藏趙昌畫梅花黃葵芙蓉山茶四詩党承旨世傑西湖芙  
蓉晚菊王內翰子端獄中賦萱凡九首予請閒閒公共作一  
軸寫自題其後云柳州怨之愈深其辭愈緩得古詩之正其

清新宛麗六朝辭人少有及者東坡愛而學之極形似之工其怨則不能自揜也党承旨出於二家辭不足而意有餘王內翰無由追配古人而偶與之合遂爲集中第一大都柳出於雅坡以下皆有騷人之餘韻所謂生不並世俱名家者也

句

幽花寂寞無多子辦與黃蜂實蜜脾

續夷堅志王子端內翰泰和中賦殘菊云云蓋絕筆也王勉道作輓詩故有幽花絕筆更傷神之句

句

猛拍闌干問興廢野花啼鳥不膺人

溥南詩話詩人之語詭譎寄意固無不可然至於太過亦其



病也山谷題惠崇畫圖云欲放扁舟歸去主人云是丹青使  
主人不告當遂不知王子端叢臺絕句云云若麀人可是怪  
事竹莊詩話載法具一聯云半生客裏無窮恨告訴梅花說  
到明不知何消得如此昨日酒閒偶談及客皆絕倒也

案溥南此論尤拘然則東坡之野花啼鳥亦欣然豈真聞好  
語而解欣然哉

王明伯

明伯若虛猶子

失題

鈞鼇公子鐵心胸興在三山碧海中十尺雲帆已高挂不知何日得

秋風

中州集幼歲學書書家卽稱賞之倜儻無機膂力絕人曾有詩云云卒於鄧州年未四十也

趙運鼎

運鼎字德新欒城人大定十六年進士官西京路轉運使

句

拜嗟筋力隨年改飲覺屠蘇到手遲

中州集喜作詩頗知道學屏山所許如此元日詩云云惜不多見

田特秀

特秀字彥實易縣人大定十九年進士官至太原轉運使

句

散木不材甯適用虛舟無意任隨流百年身世槐安國古人情羹  
頡侯 締構百年人換世消沈千古鳥盤空

中州集喜作詩爲周德卿李之純所賞感興云云賦古塔云  
云他類此彥實所居里名半十行第五以五月生小字五兒  
鄉府省御四試俱第五年五十五八月十五日卒

### 劉昂

昂字之昂興州人大定十九年進士官至左司郎中  
中州集作詩得晚唐體尤工絕句

### 山中雨

嵩高山下逢秋雨破繖遮頭水沒腰

中州集作  
過野橋

此景此時誰會得清

於窗下聽芭蕉



堯山堂外紀劉之昂山中雨詩云云祝枝山誦此詩嘗哂其  
上下淋漓清在何處

呂造

造字子成

續夷堅志呂內翰造其大父延嗣父忠嗣俱第狀元子成經  
義魁南省詞賦繼擢殿元閣門請詩有狀頭家世傳三葉天  
下科名占兩元之句

句

佳節近重陽微臣喜欲狂

歸潛志章宗時王狀元澤民在翰林會宋使進枇杷子上索  
其詩澤民奏小臣不識枇杷子惟王庭筠詩成上喜之呂狀

元造父子魁多士及在翰林上索重陽詩造素不學詩遑遽  
獻詩云云上大笑旋令外補故當時有澤民不識云云

蕭貢

貢字真卿咸陽人大定二十二年進士官至戶部尙書諡文  
簡

米元章大字卷

顏楊死去誰補處米狂筆力未可涯追摹古人得高趣別出新意成  
一家老蛟驅雲肉倔強枯樹漬雪冰楂牙九原裴說如可作應有新  
詩三歎嗟

自註裴說懷素草書歌欲歸家三歎嗟眼前三箇字枯樹楂  
烏梢蛇黑老鴉

讀火山瑩禪師詩卷

長短都歸一夢中  
身前身後雨無窮  
李愷信士今如在  
定向江湖訪澤公

自註禪師陳州白氏岐山令君舉樞判文舉之弟自幼日有詩名河東嘗有詩云十日柴門九不開松庭雨後滿蒼苔草屨挂起跣趺坐消得文殊更一來歸寂後客有示其集者因題其上

趙秉文

秉文字周臣號閒閒滏陽人大定二十五年進士應奉翰林文字興定中官至禮部尙書兼侍讀同修國史知集賢院著有滏水集三十卷



遺山集國初因遼宋之舊以詞賦經義取士預此選者選曹  
以爲貴科榮路所在人爭走之傳注則金陵之餘波聲律則  
劉鄭之末光固已占高爵而鈞厚祿至於經爲通儒文爲名  
家良未暇也及翰林蔡公正甫出於大學大丞相之世業接  
見宇文濟陽吳深州之風流唐宋文派乃得正傳然後諸儒  
得而和之蓋自宋以後百年遼以來三百年若党承旨世傑  
王內翰子端周三司德卿楊禮部之美王延州從之李右司  
之純雷御史希顏不可不謂之豪傑之士若夫沉潛乎六經  
從容乎百家幼而壯壯而老怡然渙然之死而後已者惟我  
閒閒公一人

杏花

香傳微雨隔簾櫳十載舫船不負公愁見餘春紛雪白且看初日眩  
霞紅兩株副使鶯吟裏一色新郎馬足中投老安能知許事一鞭農  
事趁春風

自註此近時字樣詩非詩也悚愧

和韋蘇州二十首

西澗

雨荒竹逕草叢生樹隔前溪一犢鳴步尋幽澗疑無路忽有人家略  
杓橫

烟際鐘

近壑歛暝色遠山猶夕暉聲從烟際起復向烟中微隨風散林野渡  
頭人未歸

西塞山

龍門

雙闕聳岩嶢神斧忽中斷一水從中來千龕道旁滿

山耕叟

步逐麋鹿迹詎知朝市情負薪南澗曲荆棘雨中行呼兒問牛飽又  
向山田耕

上方僧

石潤雲生衲崖傾月照禪曬衣橫竹錫洗鉢落岩泉但見山花發幽  
居不記年

詠夜

明從暗中去暗從明中來流光不待曉闇盡玉爐灰

詠聲



萬籟靜中起猶是生滅因隱几以眼聽非根亦非塵

寄全椒道士

潘清容自鄆移樓觀與中條喬象之同居

新移白閣峯遠訪中條客結茅授經臺共坐雲間石松龕讀易朝月  
窗談道夕從此到終身區中了無迹

遊溪

清溪霧氣散水涵天影空白雲翻着底移舟明鏡中鳥近前灘白花  
移別岸紅遙知夜來雨山色翠如蔥

秋齋獨宿

冷暈侵殘燭雨聲在深竹驚鳥時一鳴寒枝不成宿

聽嘉陵江水聲代深師答

驚湍瀉石崖百步無人跡愛此喧中靜聊布安禪席水無激石意云  
何轉雷聲仁者自生聽達士了不驚心空境自寂淡然兩無情

演師西齋

不見竹間僧但聞花外磬敲檻出魚遊巢簷知鳥性雲蒸坐禪石露  
濕行道逕夜寂一燈殘山月來破暝

遊開元精舍

松軒風掃靜終日閉門居犬臥青苔地鳥銜紅柿初瓶殘夜禪起經  
潤雨翻餘自是少人迹非關往來疎

答中山道士

行轉青溪又別峯馬蹄終日認樵蹤翠微深處無人住寺在深山何  
處鐘

西樓

十去龍沙雁年年九不歸烟塵猶未息莫近塞雲飛

瑯琊萬壽寺

茲寺廢已久經構昔未遑一朝煥金碧煌煌耀東崗  
文母開大施天廚來衆香縈回轉佛閣窈窕閼禪房  
平地俯歸鳥高齋在上方宿雲不歸山野水自成塘  
道人如水鏡見者心清涼理勝是非遣慮淡形蹟忘  
歸鞍惜清境佇立暮天蒼

漠漠來帆重冥冥去鳥遲

薄暮瀟瀟雨何人獨倚欄濛濛山氣重漠漠水紋寒  
草際光猶泫松梢滴未乾燈前未歸客無夢到長安

何時風雨夜復此對床眠



幽居少人事有客來不速爐內火正紅尊中酒新綠高齋始聞雁隔窗時動竹何當風雪夜抱被還同宿

綠陰生晝寂孤花表春餘

了無車馬迹終日掩禪關不下溪頭路坐看簷際山好鳥破午寂幽花淡春閑簪組方爲累來遊不知還

兵衛森畫戟燕寢凝清香

冠帶事朝謁清坐彈鳴琴以彼塵外趣遠我遺世心岸幘送歸鳥隱几見遙岑聊得靜者樂豈必居山林

倣摩詰獨坐幽篁裏

獨坐幽林下談玄復觀易西日半啣峯返照林閒石石上多古苔山花間紅碧花落人不知山空水流出

知不足齋藏元好問題趙閒閒真蹟後趙閒閒書擬和章蘇  
州詩跋閒閒公以正大九年五月十二日下世此卷最爲暮  
年書故能備鍾張諸體於屋漏雨雖畫沙之外別有一種風  
氣令人愛之而不厭也百年以來詩人多學坡谷能擬章蘇  
州王右丞者唯公一人唯真識者乃能賞之耳

湧雲樓雨二首

片雲頭上一聲雷欲到冠山風引回窗外忽傳林葉響坐看飛雨入  
樓來

簾雨風斜不上鈎欄干吹濕怕人愁雷聲驅雨東山去留下斜陽恰  
半樓

湧雲樓雨

滿地江湖夢連陰晦朔秋雨中山似醉風外浪如愁眼病憎黃卷心  
安任白頭明年一官滿誰復話登樓

滏水集湧雲樓記大安二年夏四月余來蒞平定登城樓而  
樂之樓枕古榆關下建十丈旂袤以五筵廣三之二窗闥軒  
豁俯瞰閭閻旁引重山複嶺之阻左挹土門右控大鹵大行  
倚之羣山迤之道京師而來者歷汾晉接秦隴走雲代商旅  
絡繹使駟旁午車摧馬踣日不半舍使人目寒而足慄悽然  
有去國之悲皋落之山晉陽之泊廣陵之故道井陘之故關  
地古天荒岩深樹老使人心折而骨悲黯然有懷古之思若  
乃烟容雨態倏忽明晦欄檻半晴野無完塊雌霓半空雄風  
千里絺綌以清郊鄠汗泚秋空月明飛光皦楹爾屋穿漏我



居蓬瀛雪漲千山北風其寒我續而溫爾縷其單觴于斯詠  
于斯會賓友于斯其亦有思乎古之君子內淵覲而外昭曠  
淵覲則悔吝不生昭曠則不蔽於物其於居室也亦然寥寥  
之處淵如也高明之居曠如也淵覲所以存神昭曠所以知  
政靜以養恬動以應物萬變之來了然吾胸中而不惑茲曠  
也祇其所以爲達也歟

長白山行

長白山雄天北極白衣仙人常出沒玉龍垂爪落蒼崖四江飛下天  
紳白匹馬渡江龍飛天雲起侯王化千百至今甲第多屬籍時清毬  
馬爭馳突錦韉貂帽獵春風五陵豪氣何飄忽前年北騎瞰中原準  
擬長城如削鐵君家兄弟真連璧胸中十萬森戈戟向曾論事天子

前漢庭諸人動顏色心知不易一囚命顧肯貪功事無益西南方面  
應時須帝曰來前無汝易從來十益不補損三輔蕭條半荆棘瘦妻  
曳耙女扶犁惟恐官軍缺糧給嗚呼瘡痍尙未復且願休兵養民力  
老夫謬忝春官伯白首書生不經國佇公功成歸廟堂再獻中興二  
三策

大金國志長白山白衣觀音所居其山禽獸皆白黑水發源  
於此舊名粟末河後改名混同江

### 記夢

六年京國鬢塵黃一望家山一斷腸病後始知謀退晚夢中猶記和  
詩忙風來竹裏娟娟好水過花間冉冉香學道無成還自笑人生習  
氣果難忘

淦水集自注第三聯夢句

野菊

離離崑下菊無主  
混蓬茅路斷秋光隔  
山明水影交  
荒叢鳴蟋蟀寒  
葉掛蠨蛸擬訪陶廬飲  
柴扉何處敲

古瓶蠟梅

石冷銅腥苦未清  
瓦壺溫水照輕明  
土花暈碧龍紋澀  
燭淚痕疎雁  
字橫未許功名歸  
鼎鼎且收風月入  
瓶罍嬌黃喚起  
昭陽夢漢苑淒  
涼草棘生

九日會極目亭

孤亭高壓冷雲堆  
九日登臨貰酒杯  
魏國河山殘照在  
梁王臺殿野  
花開鷗從白水明  
邊沒雁向青天盡  
處回未必龍山如  
此會座中三



館盡英才

歸潛志正大初閒閒長翰苑同陳正叔潘仲明雷希顏元裕  
之諸公作詩會嘗賦野菊云云諸公稱其破的又分韻古瓶  
蠟梅云云後嬌黃句甚工同館閣諸公九日登極目亭云云  
案以上三詩皆照溢水集首韻志皆缺錄野菊詩路斷作岡  
斷山明作河明水影作月影鳴作號寒葉作病葉擬作欲陶  
廬飲作陶彭澤蠟梅詩土花暈碧作茗華吐碧九日詩臺殿  
作樓殿

草堂

幾家籬落掩柴關盡在浮嵐湧翠間稻壠明邊通白水竹梢缺處補

青山

過咸陽二首

獨立橋邊望白雲  
摩挲古塚石麒麟  
千秋萬古功名骨  
盡作咸陽原上塵

上林池籞鎖芳塵  
直抵南山不屬人  
世上千年陵谷變  
千村桑柘鵲鳩春

石刻拓本趙閒閒游草堂詩跋  
禮部閒閒先生辭翰爭輝耀  
騰天下孰不仰之正大乙酉  
季冬奉使夏臺廻游草堂題詩  
七章咸陽懷古二章爲捐義金  
刊諸貞石撰傳不朽丙戌仲夏  
中伏鑑山方亨謹跋

題東巖道人讀書堂

山頭佛屋三五間  
山勢相連石嶺關  
名字不妨從我改  
更稱元子讀

書山

自註裕之先大夫讀書于此東巖其自號也

樂善堂詩

人皆有兩足不踐荆棘地人皆有兩手不廟虎兇齒如何身與心擇善不如是從善如登天從惡如棄屣而於趨舍乖知之不審耳盜跖膾人肝顏子一瓢水均爲一窖塵誰光百世祀較其得失間奚翅千萬里所以賢達人去彼而取此道腴時雋永世味不染指作詩銘吾堂兼以勗諸己

遺山集閒閒自書樂善堂詩跋閒閒公此詩爲他人作而皆公日用之實古人謂有德者必有言又曰立言踐行公無愧焉今日見公心畫玩其辭旨不覺斂衽生敬公嘗爲襄城廟



學作省齋銘云言有非耶行有違耶君子之棄而小人之歸  
耶銘不滿二十言而於三省之義委曲備盡可以一倡而三  
歎惜今世不傳因附於此癸丑六月吉日門生河東元某謹  
書

王修齡

修齡字紹先同州人

句

得意好花開早落喚愁芳草燒還生

中州集詩有云云閒閒愛而戲之目爲癡仙人

李天英

失題

長河老秋凍馬怯冰未牢河山冷鞭底日暮風更號晨井凍不爨誰料寒士飢天廢玉山禾不救我馬隤

塵埃汨沒伺候工離騷不振矜魚蟲風雲誰復話著蔡不圖履狶哀屠龍挾牋搦筦坐書空伊優堂上醉歌鐘乃如造化戲兒童不妨遠目逐孤鴻莫怪魏瓠無所容此去未許江船東五經不埽途輒窮門庭日日生皇風太阿剖室砥以石坐埽鵝鸛搖天雄

岩椒鬱雲日夕生陰雨雪縞夜秋黃老林人烟墨突樵徑雲深造物開岩地石帳開劍壁苔花張古錦霜葉老秋碧日夕雲竇陰風鼓泉湧石馬蹶忌磽确樵道生枳棘盤盤出井底回首悵如失長老不耐役底事挂塵迹披雲出山椒白鳥表林隙

淦水集答李天英書寄來詩如云云其餘老昏殊不可曉然

此迄令大成不過長吉盧仝合而爲一未能以故爲新以俗爲雅非所望於吾友也昔人有吹簫學鳳鳴者鳳鳴不可得聞時有梟音耳君詩無乃閒有梟音乎向者屏山嘗語足下云自李賀死二百年無此作矣理誠有之僕亦云然李公愛才然愛足下之深者宜莫如老夫願足下以古人之心爲心不願足下受之天而不受之人如世輕薄子也與足下心知故道此意幸少安毋躁

高汝礪

汝礪字巖甫應州金城人大定中進士宣宗朝參知政事進平章政事右丞相封壽國公

句



寄謝東門千樹柳安排青眼送行人

中州集南渡之後機務倥偬未嘗一日廢書不觀臨終留詩  
有云云之句時年七十一

胥鼎

鼎字和之代州繁峙人大定二十八年進士官至平章政事  
封英國公

句

世事政須高著眼宦途未厭少低頭

中州集送弟有之云云他文類此

朱瀾

瀾字巨觀大定二十八年進士官翰林待制

宮詞

太一芙蓉上下天秋波澹澹白生烟採蓮宮女分花了笑把蘭蒿學

刺船

中州集歷諸王文學嘗入教宮掖故集中多宮詞

劉仲傑

登陶山寺

遺跡千年事恐誣幽棲誰信爲陶朱不知古寺東山洞曾與西施共  
隱無

濱州志仲傑字時彥山東濱州人大定間任鄆城令歷清河  
令遷太常博士有陶山寺詩

金詩紀事卷七

侯官陳衍緝

楊雲翼

雲翼字之美樂平人明昌五年經義進士第一人詞賦亦中乙科官至翰林學士禮部尙書卒諡文獻

遺山集文章與閒閒公齊名世號楊趙高文大冊皆出其手典貢舉三十年門生半天下

戲贈閒閒

中朝人物謫仙才金節煌煌使夏臺得句逢人唾珠玉揮毫落紙散  
瓊瑰一封書貸揚州牧半夜雷轟薦福碑窮達書生略相似滿頭風  
雪却回來



庶齋老學叢談金朝學士趙秉文使西夏中途聞夏主殂而回楊尙書之美以詩戲之云云

韓玉

玉字溫甫漁陽人明昌五年經義詞賦兩科進士官至河平軍節度副使被誣死獄中

中州集入翰林爲應奉應制一日百篇文不加點又作元勳傳稱旨道陵歎曰勳臣何幸得此家作傳耶

臨終二詩

客自朝那戍東過古鄭原衰年會凶運奇禍發流言白骨將爲土青蠅且在樊仰呼天外恨沉思地中冤母喪半途鬼兒孤千里魂此心終不滅有路訴天閭

天下無雙士軍中有一韓才名兩相累世道一何難旅次窮冬莫囚  
孤永夜寒身亡家亦破巢覆卵寧完矍鑠鞍仍在驚呼缺屢彈丈夫  
忠義耳無惜感歌還

金史韓玉傳大安三年都城受圍夏人連陷邠涇陝西安撫  
司檄玉以鳳翔總管判官爲都統府募軍旬日得萬人與夏  
人戰敗之獲牛馬千餘時夏兵五萬方圍平涼又戰于北原  
夏人疑大軍至是夜解去當路者忌其功驛奏玉與夏寇有  
謀朝廷疑之使使者授玉河平軍節度副使且覘其軍先是  
華州李公直以都城隔絕謀舉兵入援而玉恃其軍爲可用  
亦欲爲勤王之舉乃傳檄州郡云公直一軍行有日矣將有  
違約國朝人有不從者輒以軍法從事京兆統軍便謂公直

據華州反遣都統楊珪襲取之遂寘極刑公直曾爲書約玉  
玉不預知其書乃爲安撫所得及使者覘玉軍且疑預公直  
之謀卽實其罪玉道出華州被囚死於郡學臨終書二詩壁  
間士論冤之子不疑字居之以父死非罪誓不祿仕藏其父  
臨終時手書云此去冥路吾心皓然剛直之氣必不下沉兒  
可無慮讀者惻然

張建

建字吉甫自號蘭泉老人蒲城人明昌初舉才行官至同知  
華州防禦使事

山村風雨圖

雨昏山店望未見風緊傘簷張不開莫訝披圖便成句爲曾行到此



中來

中州集吉甫又嘗有詩云風卷旱塵攙馬過雲移涼影趁人行其寫目前之景甚與山村風雨詩相似今附於此

弔張器之

惜哉器之眞丈夫少年讀徧天下書一事不成死於途苗而不秀有矣夫秀而不實有矣夫

又張瓚字器之河中人才氣超邁時輩少見其比年未二十以鄉試魁陝西河東不幸早逝張吉甫弔之云云其爲名流所嗟惜如此

張櫟

櫟字巨濟山陰人明昌五年詞賦第一官至鎮戎州刺史

永寧劉氏園亭

菊老芙蓉衰梨柿葉爭絳叩門人不應一犬吠深巷

句

駭浪奔生馬荒山臥病駝

陝州

中州集文賦詩筆截然有律度詩云云此類甚多

酈權

權字元興安陽人明昌初以著作郎召未幾卒有坡軒集

句

斷橋經壞屋古道入摧山  
蒼崖秀苔花壞道補石棧徐行下井底  
斗上出天半  
離宮歸相望百年幾遊歷獨知窮已樂衆懟不汝恤  
繁花忽灰燼歲月空瓦礫  
水近噓寒氣星殘曳白芒  
炎威隨變

滅餘燼委丘壤田疇更斷續原隰依下上班班澗溪毛往往漏尋丈  
晴空墮雪影夕照壓秋嶂昆明翻劫灰黑水走濁浪烟中一線來細  
路入空曠雲間兩石角相鬪如闕門上連石甕口豁舒愁揉猿枵  
如空洞腹瑩潔無纖痕何年補天手月斧雲爲斤琢成蒼玉甌覆此  
玻璃盆臺高野望遠地僻春意閒強引村醪終少味漫留詩句  
嬾題名瘦藤籬角蔓雜草樹根花夾道懸新棗荒畦臥晚瓜歲  
豐人樂社秋近客思家佳樹漲新綠危叢棲老紅茶竈翻春白  
糟牀滴曉紅樹影僧攜錫鈴聲客到門片月冷千嶂敗橋通兩村  
中州集作詩有筆力圃田道中云云石澗云云綺岫宮云云  
赤水道中云云燒痕云云游石甕云云龍潭云云郊行云云  
村行云云云書事云云與顯叔云云雜詩云云此類甚多



田琢

琢字器之雲朔人明昌五年進士官至山東路宣撫使

贈燕

幾年塞外歷崎危誰謂烏衣亦此飛  
朝向蘆陂知有爲莫投茅舍重相依  
君憐我處頻迎語我憶君時不掩扉  
明日西風悲鼓角君應先去我何歸

田器之燕子圖自敘明昌丙辰予從軍塞外合魯里山野舍荒涼難以狀言春末有雙燕亦巢此屋土人不之識屢欲捕之予曲爲全護此燕晝出夜歸予必開戶待之忽一日飛止坐隅都無驚畏巧語移時不去予始悟明日秋社此鳥當歸殆留別語也因作一詩贈之云云此詩以細字寫之爲蠟丸

繫之燕足上明年四月予受代歸又八年泰和甲子任潞州  
觀察判官四月十二日偶坐廨舍之含翠堂忽雙燕至一飛  
簷戶間一上硯屏予諦視之繫足蠟丸故在乃知此鳥蓋往  
年贈詩者也因請同年龐君才卿畫爲圖求諸公賦詩

趙思文

思文字庭玉永平人明昌五年進士官至禮部尙書

捕蝗感草蟲有作二首

雖是形模不苦爭汝能傷稼我能鳴誰知竟有長平禍玉石填來共  
一坑

草蟲悲咽不能言亂逐螟蝗瘞古原水底癡龍正貪睡甕中蝎虎更  
銜冤

中州集貞祐中陷歿都城間關南渡遂爲朝廷所知二詩疑  
圍城中作觀者可以意推之

張翥

翥字仲楊

句

矮戶小窗寒不到一爐香火四圍書 西風了却黃花事不管安仁  
兩鬢秋

歸潛志明昌閒作詩者尙尖新故張翥仲楊由布衣有名召  
用其詩大抵好浮艷語如云云又號張了却劉少宣嘗題其  
詩集後云楓落吳江真好句不須多示鄭參軍蓋譏之也

張在



青州老柏院

南鄰北里牡丹開公子王孫去不回惟有庭前老柏樹春風來似未曾來

中州集孫鐸振之明昌中擢戶部尙書時已有相望及考滿以戶曹繁重未有可代者特旨再任而同列二人俱以入相矣振之賀席中舉青州老柏院布衣張在詩云云爲御史所劾降授同知河南府事有以詩送之者云云

趙颯

颯字文孺黃山其自號登進士第明昌末官終禮部郎中

貢院聞雨

燈暗風翻幔蛩吟葉擁牆人如秋已老愁與夜俱長滴盡階前雨催

成鏡裏霜黃花依舊好多病不能觴

黃山道中

小穀城荒路屈蟠石根寒碧漲秋灣千章秀木黃公廟一點飛雲白  
塔山好景落誰詩句裏蹇驢馱我畫圖間膏肓泉石眞吾事莫厭乘  
閒數往還

湓水集題李平父畫黃山蹇驢詩圖二首浮光林杪水參差  
意想先生得句時千古黃山山下路蹇驢不是少人騎三十  
年前濟水東詩人曾識蹇驢翁而今畫出推敲勢却恐相逢  
是夢中

得鵝應制

駕鵝得暖下陂塘綵騎星馳入建章黃傘輕陰隨鳳輦綠衣小隊出

鷹坊搏風玉爪凌霄漢  
瞥目風毛墮雪霜  
共喜園陵得新薦  
侍臣齊捧萬年觴

歸潛志閒閒稱趙黃山詩燈暗云云此詩信佳詩也又黃山嘗於黃山道中作詩有好景云云世號趙蹇驢余先子嘗談章宗春水放海青時黃山在翰林扈從既得鵝索詩黃山立進之章宗稱其工且曰此詩非宿構不能至此

中秋

秋氣平分月正明  
藥珠宮闕對蓬瀛  
已驅急雨消殘暑  
不遣微雲點太清  
簾外清風飄桂子  
夜深涼露滴金莖  
聖朝不奏霓裳曲  
四海歌謳卽樂聲

中州集史舜元嘗從文孺學詩說道陵中秋賞月瑤光樓召



文孺對御賦詩以清字爲韻道陵讀至落句大加賞異手酌金鍾以賜且字之曰文孺以此鍾賜汝作酒直士林榮之高祖言吾不如子房君父字呼臣下不爲無故事也

句

峨峨景明宮五雲湧蓬萊山空白晝永野曠清風來 晴日未清千嶂雪暖風先放一川花青天低處是平野白鳥去邊明落霞 桃花都被風吹却楊柳似將煙染成

又行草超放又似楊凝式當處黃魯直蘇才翁伯仲閒党承旨篆陽冰以來一人而已而以黃山配之至今人謂之党趙有黃山集行世涼陘云云放遠亭云云泰村道中云云其餘多稱此

周昂

昂字德卿真定人年少擢第官至六部員外郎有常山集

中州集入拜監察御史路宣叔以言事被斥德卿送以詩坐  
謗訕停銓

潯南詩話史舜元作吾舅詩集序以爲有老杜句法蓋得之  
矣

登綿山上方

環合青峯插劍長小平如掌寄禪房危闌半出雲霄上祕景盡收天  
地藏野闊羣山驚破碎雲低滄海認微茫九華藉甚因人顯迴秀可  
憐天一方

芹城小志綿山在昌平州東十五里元混一方輿勝覽載有

綿山寺金真定周昂題詩其上有野闊云云警句也

冷巖行賦冷巖相公所居

或爲孟或爲鍾人心自異山本同天清雲遠望不極小孤宛在江流  
中澗之毛可筐筥山之木可斤斧唯有白雲高崔嵬風吹不消自太  
古峴山何奇羊子所攀東山何秀謝公往還今爾胡爲藉甚乎人間  
吁嗟乎冷山

自註冷巖賢宰相宗室永貞自號也

堯山堂外紀司馬永貞金宗室時稱賢宰相自號冷巖周昂  
有詩

王若虛

若虛字從之藁城人承安二年經義進士官至翰林應奉轉



直學士有慵夫集潯南遺老集

中州集少日師其舅周德卿及劉正甫崔立之變以都堂命  
召從之從之外若遜辭而實欲以死守之時議稱焉癸卯東  
遊憩於黃峴峯之萃美亭談笑而化

潯南詩話吾舅嘗論詩云文章以意爲之主字語爲之役主  
強而役弱則無使不從世人往往驕其所役至跋扈難制甚  
者反役其主可謂深中其病矣

慵夫自號

身世飄然一瞬閒更將辛苦送朱顏時人莫笑慵夫拙差比時人得  
少閒

潯南集若虛與彭悅王權周嗣明爲林下四友自爲贊并序

云嘗約他年爲林下之游且各爲別號以自寄焉蓋予以慵  
夫而子升以澹子士衡爲狂生而晦之則放翁也曰澹曰慵  
曰狂曰放世以爲怪而自謂其真施於仕途固非所宜而在  
隱居則無害也是故安之而不疑爲是約已遂想像而贊之  
云盤礴兮巖阿容與兮煙蘿藉豐草兮偃臥愬長風兮浩歌  
塵海邈其如隔渺高軒兮不我過險而風波密而網羅突而  
干戈如四人者何又慵夫自號云云

山谷於詩每與東坡相抗門人親黨遂有言文首東坡論詩右  
山谷之語今之學者亦多以爲然漫賦四詩爲商略之云

絕足由來不可追汗流餘子費奔馳誰言直待南遷後始是江西不  
幸時

信手拈來世已驚三江袞袞筆頭傾莫將險語誇勁敵公自無心與物爭

戲論誰知出至公螭蟬信美恐生風奪胎換骨何多樣都在先生一笑中

文章自得方爲貴衣鉢相傳豈是真已覺祖師低一著紛紛嗣法更何人

王內翰子端詩近來陡覺無佳思縱有詩成似樂天其小樂天甚矣漫賦三詩爲白傅解嘲

功夫費盡謾窮年病入膏肓豈易鐫寄語雪溪王處士恐君猶是管窺天

東塗西抹鬪新妍時世梳粧亦可憐人物世衰如鼠尾後生未可議



前賢

妙理宜人入肺肝  
麻姑搔背豈勝鞭  
世間筆墨成何事  
此老胸中自有天

遺山集經解不善張九成  
史例不取宋子京詩不愛黃魯直  
著論評之凡數百條世以劉子玄史通比之文以歐蘇爲正  
脈詩學白樂天作雖不多而頗能似之

王良臣

良臣字大用潞人承安五年進士

南征道中

蕎花冉冉蜜脾香  
禾穗纍纍鵲眼黃  
一縷晚煙吹不去  
爲誰著意護秋霜

中州集作詩以敏捷稱與李欽叔善從軍南征欽叔亦興行  
道中酬唱甚多有詩云云欽叔愛之興定初自請北行沒於  
軍中贈孟州防禦使

句

筆底有神扶氣力人閒無地著聲名

歸潛志王翰林良臣長於律詩尖新工對屬南渡在館後從  
李天英北征遇害其上移刺總管云云人多傳之

元德明

德明號東巖秀容人累舉不第好問本生父

代郡楊叔玉撰墓銘唐禮部侍郎次山之後

續夷堅志先人宰陵川泰和甲子元夕縣學燒燈有以杏棣

棠枯枝爲剪綵花者燈罷家僮乞之供於縣署佛屋中四月上七夜先夫人焚誦次乃見杏棠皆作花眞贗相閒先人會賓示之以爲文字之祥爲賦瑞花詩予年始十五矣

明一統志繫舟山在太原府城東北九十里禹治水繫舟此山故名有石如環軸曰繫舟嵬元好問父德明讀書其下趙秉文改曰讀書山好問詩從此晉陽方志上繫舟山是讀書山又云繫舟南北暮雲平落日滹沱一線明

鳳山

鳳凰聞說似天壇北去南來馬上看想得松聲滿巖谷秋風無際海波寒

遺山集先東巖君生平愛鳳山

鳳凰山在鴈門

然竟不一到故詩有



云云之句予二十許時自燕都試乃與客登南樓亡友蘇莘  
老閻德潤張九成王仲容輩說山中道人所居有松風軒層  
簷高棟半出空際長松滿澗谷如雲幢烟蓋植立闌楯之下  
山空夜寂石上聞墜露聲使人耿耿不寐

李俊民

俊民字用章號鶴鳴老人澤州人金承安中舉進士第一應  
奉翰林文字入元召見乞還山卒賜諡莊靖先生

寄趙庭幹

試將小錄問同年風采依稀墜目前三十一人今鬼錄與君雖在各  
華顛

君還携幼去幽燕我向荒山學種田千里暮鴻行斷處碧雲容易作

愁天

莊靖集余閱承安庚申登科記三十三人革命後獨與高平趙楠庭幹二人在一日邂逅於鄉邑哽咽道舊壬寅歲五月初吉庭幹復挈家之燕京感慨忍淚書五十六字寄之癸卯春

贈張仲一

丹鳳啣書下九霄山城和氣動民謠久潛龍虎聲相應未戮鯨鯢氣尙驕萬里江山歸一統百年人事見清朝天教老眼觀新化白髮那堪不肯饒

中堂事記追諡前經義狀元李俊民爲莊靜先生先生字用章曠澤人明昌間進士道號鶴鳴老人在河南時於隱士荆

先生傳皇極數學己未閒聖上在潛令張仲一就問禎祥優  
禮有加至是先生已歿其言盡徵故有是命以旌其德學云  
初張辭去繼請以蒲輪來起公先生笑不答贈詩以見方來  
其辭云云明年正月先生卒于家

和子榮悼恆山韻

功名人比漢淮陰猛虎俄因犬輩擒星落旄頭兵似火雲屯細柳士  
如林豈期虞虢乖脣齒謾倚良平作腹心灑盡英雄憂國淚變風那  
得不傷今

元詩選恆山謂恆山公武仙其次首云唐家外望歸藩鎮漢  
室中興仰羽林又剛忠公一首云斷頭那肯降朱泚血指誰  
思滅賀蘭皆爲汴京之亂言之也



襄陽咏史

漢高廟

在襄陽縣西南鍾山

垓下未聞歌散楚澤中已見哭亡秦乾坤到底歸眞主愁殺鴻門碎  
斗人

光武廟

在襄陽東四十五里

海內英雄待一呼雲龍際會入東都羯奴不識眞人事徼幸中原欲  
竝驅

自註光武南陽棗陽人今棗陽縣是也春陵在棗陽東望氣  
者蘇伯阿至南陽遙見春陵曰氣佳哉鬱鬱蔥蔥光武始起  
兵還春陵望舍南火光燭天今棗陽在襄陽東界六十里

宋玉宅

在宜城縣

離騷經裏見文章水綠山青是楚鄉往事一場巫峽夢秋風搖落在東牆

關將軍廟

在襄陽南九里鳳林關

鼎足相吞勢未分誰能傾蓋得將軍曹吳不是中原手天下英雄有使君

劉表祠

祠前有墓在府城東門內

天運端能臥可收江山形勢數荊州當時若聽韓嵩策那得曹瞞享士牛

自註曹操與袁紹相持於官渡韓嵩說表起乘其弊表不從操征表表之子琮竟以荊州降

鳳林

孟浩然故居在襄陽縣南十里

天寶詩人去却回果曾北闕上書來若爲耆舊無新語明主何嘗棄不才

自註張參議有朝宗強欲相牽率豈識先生玩世心

杜甫故里

杜易簡預之遠裔有從弟曰審言生子閑閑生甫世居襄陽甫徙家鞏縣

不知故隱幾時離天寶年間處處詩過客不須尋世譜萬山山下看沈碑

自註杜詩吾家碑不昧王氏井依然注杜預沈碑峴山之下

平水八詠

陶唐春色

松柏森森護帝宮至今和氣在河東詩人不盡當時事八景圖中見國風



自註府西南三里有陶唐廟每至春月傾城出游祭享

廣勝晴嵐

等閒過了萬千峯  
偃蹇相看意不濃  
洗出青山真面目  
祇疑海底有天龍

自註府北七十里有寺曰廣勝霍山陽寺下有海曰大郎

平湖飛絮

三月湖邊被禊亭  
依依楊柳雨中青  
晚來風起花如雪  
春色都歸水上萍

自註府西五里有泊曰平湖姑山之東汾水之西四面皆楊柳如幄三月上巳居民被禊於此

錦灘落花

春風桃葉復桃根  
相妬封姨似少恩  
無限亂紅隨水去  
人閒何處覓仙源

自註府西門外有汾水退灘南北二十餘里皆樹桃焉

汾水孤帆

古渡無人鳥跡多  
眼前歷歷舊山河  
片帆不是秋風客  
誰向中流發棹歌

自註府西二三里有渡口

姑山晚照

物外神仙自一家  
等閒不許占煙霞  
只今冰雪人何處  
惆悵山前日易斜

自註府西五十里有姑射山神人居焉

晉橋梅月

嫩寒籬落似江村雪裏精神月下魂  
橋北橋南路分處行人立馬待黃昏

自註府西南二十五里有縣曰襄陵北門外有橋如虹左右皆梅圃

西藍夜雨

莫雲深鎖梵王家樓閣崢嶸閱歲華  
香火半殘僧入定臥聽窗外落簷花

自註府北五十五里洪洞縣之西有寺曰西藍近汾水二里遶寺多花竹有水杯池

范中



中字極之大興人承安中進士官滑州刺史

戲作

嚼蠟誰知味最長一杯卯酒地龍香年來紙價長安貴不重新詩重

藥方

中州集貞祐中高琪當國專以威刑肅物士大夫被摑撫者  
笞辱與徒隸等醫家以酒下地龍散投以蠟丸則受杖者失  
痛覺此方大行於時極之有戲作云云時人傳以爲笑極之  
嗜讀書一以資於詩詩亦往往可傳壬辰卒於京師年五十  
七

李純甫

純甫字之純號屏山宏州人承安間進士官至尙書右司都

事

歸潛志中年度其道不行益縱酒自放得官未嘗成考旋即歸隱居閒與禪僧士子游惟以文酒爲事嘯歌袒裼出禮法外或飲數月不醒人有酒見招不擇貴賤必往往輒醉雖沉醉亦未嘗廢著書至於談笑怒罵燦然皆成文理天資喜士後進有一善極口稱推一時名士皆由公顯於世又與之拍肩爾汝忘年齒相懽教育撫摩恩若親戚故士大夫歸附號爲當世龍門嘗自作屏山居士傳晚自類其文凡論性理及關佛老二家者號內蘂其餘應物文字如碑誌詩賦號外蘂蓋擬莊子內外篇又解楞嚴金剛經老子莊子又有中庸集解鳴道集解號中國心學西方文教數十萬言

歸潛志李屏山教後學爲文欲自成一家勿隨人腳跟故多  
喜奇怪然其文亦不出莊左柳蘇詩不出盧仝李賀晚甚愛  
楊萬里屏山嘗序閒閒集云公詩往往有李太白樂天語某  
輒能識之又云公謂男子不食人唾後當與之純天英作眞  
文字亦陰譏云

爲蟬解嘲

獻臣伯玉  
不平蟬解

老蜣破衲染塵緇轉丸如轉造物兒道在矢溺傳有之定中幻出蟬  
娟姿金仙未解羽人屍呼風飲露巢一枝倚杖而吟如惠施字字皆  
以心爲師千偈瀾翻無了時關健不落詩人詩屏山參透此一機髯  
弟蟠兄何見疑此理入玄人得知髯弟恐我淪却西山秀蟠兄勸我  
吸却壺盧溪因蟬倩我問渠伊快掉葛藤復是誰髯弟絕倒蟠兄嘻



自注張有登樓詩昨日上高樓西山翡翠堆今日上高樓西山如死灰想見屏山老療饑西山限食却西山色高樓空崔嵬高有壺溪詩云我觀壺溪水未可以蠡測大若溪上翁有口吸不得壺中別是一洞天溪上翁卽壺中仙畢竟人間無著處杖頭挑取屏山去

### 白賁

元詩癸集賁字君舉號寓齋隴州人弱冠登金泰和三年詞賦進士第歷懷寧主簿岐山令詩名與遺山元好問相頡頏元白爲中州世契兩家子弟每舉長慶故事以詩文相往來北渡後卜築於渚陽結茅爲亭有茅亭詩樂城李治序之云云臨川吳澄曰巧妙醜麗錯諸吳楚歌謠中幾莫可辨弟華

字文舉亦登貞祐三年進士第歷官樞密院判

案中州集白賁下不云字君舉而元詩癸集合爲一人且言其弟華字文舉斷無其兄有字而無名中州集郝經本稱百卷而今只十卷其缺誤必所不免顧俠君於金元事博極羣書今從癸集

題靖節圖

咄哉靈運輩竟坐衣冠辱誰知五柳家春雨東臯綠

酬元遺山

夢裏薰風湛露歌花開漢苑舊經過拾遺老去青春暮司馬歸來白髮多橫槩賦詩吾豈敢短衣扣角夜如何相逢未盡相思話草色連雲水碧波

梧溪集李治序其詩曰龍韜雷厲於紛拏之頃玉唾川流於  
談笑之餘逢觀其題靖節圖有云云風節可概見矣併錄酬  
元公八句云云弟文舉亦登貞祐進士第馮西巖內翰有科  
第聯飛光白傅之句稱擬云

句

欲搜春草池塘句藥裏關心夢不成

遺山集李定齋有詩寄白以因風何惜數行書爲落句白酬  
答云云余平解之云金粟岡頭有髮僧遙知默坐對龕燈書  
郵但覺浮沉久詩卷何緣唱和曾白日放歌須縱酒清朝有  
味見無能相逢定有池塘句藥裏關心恐未應













